

Doño di Tierra Del Sol

Bancarota di compania di van den Nieuwenhuizen

ORANJESTAD (AAN) Manera cu tabata di spera, cos a yega asina leu cu na Curacao bancarota a wordo pidi riba e compania di Joep van den Nieuwenhuizen kende ta doño tambe di Tierra del Sol na Aruba.

For di Hulanda tabata biniendo algun siman pasa informacionnan cu e miyonario Joep van den Nieuwenhuizen, kende ta doño di Tierra del Sol na Aruba, lo tabata envolvi den cierto practicanan dudoso cu e com-

panianan cu e tin na Hulanda unda miyones di placa di gobierno a desaparece.

Na Aruba esnan cu tin cas na Tierra del Sol y esnan cu tabata tin placa inverti den proyecto pa laga traha cas na Tiera del Sol tabata hopi preocupa pa nan placa y asina tambe e bala a cuminsa lora te cu documentonan picante a cuminsa sali riba caya y a bin sali afor cu prome ministro Nel Oduber a fix asunto di placa di belasting pa Tierra

del Sol y Joep van den Nieuwenhuizen.

Tierra del Sol tin un debe di 10 miyon florin na erfpacht cu nan no a paga, pero pa nan por a haya un tereno basta grandi pa haci proyecto nobo di construccion di cas nan mester a haya permit di gobierno pa e tereno wordo reparti den kavelnan di cas.

Cu e debe habri di 10 miyon florin, nan no por a cuminsa cu e proyecto y asina prome ministro a yega na un deal cu Joep cu nan ta paga por lo pronto solamente 1 miyon florin riba e suma total di 10 miyon y ora cu esaki a sali den publicidad y pueblo a ripara con tras di cortina asuntonan di placa di pueblo ta wordo regla na un forma straño, ta mesora hopi critica a wordo lansa riba e gobierno actual.

Gobierno na su turno a core tira e asunto aki manera custer den scochi di e go-

bierno anterior y asina tambe e mesun yoramento cu pueblo a bin ta tende pa tres aña caba, atrobe tabata riba pantaya politico di mal gobernacion.

Prome ministro a reacciona masha onsportief mes ora cu e informacion a leak, pero e hecho a keda cu nan a fix pa Joep paga solamente 1 miyon pa un proyecto cu Joep y consorcio lo gana miyones cune siendo cu nan debe pais Aruba 10 miyon.

Debi na e situacion di mal tempo y horcan tur atencion riba e caso aki a para pa un rato, pero awor a bin sali afor cu na Curacao bancarota a wordo pidi riba e compania madre di Joep cu yama RDM Holding y cual compania lo ta doño di Tierra del Sol na Aruba y Joep mes a baha na awa bay biba na Zwitserland.

Segun Joep, no ta huy el a huy, pero riba conseho di su expertonan financiero el a dicidi di bay biba na Zwitser-

land.

Na Curacao tras di otro esnan cu mester haya placa di compania di Joep ta bati na porta pa nan haya nan placa y no ta conoci si gobierno di Aruba tambe a cuminsa cana e caminda pa logra na cobra e 10 miyon florin cu Joep debe pais Aruba.

Mirando cu Aruba a caba di pasa den basta desastre di e horcan Ivan, na e momentonan aki 10 miyon florin ta yuda pa laga drecha entre otro careteranan cu a kibra durante horcan Ivan.

Durante e dianan venidero DIARIO lo bin cu mas informacion riba e caso di Tiera del Sol pasobra ta hopi informacion a wordo compila riba loke tabata pasando na Tiera del Sol y tin peliger grandi cu e proyecto aki por bolbe bay den direccion cu bancarota por wordo pidi na Aruba tambe riba tur loke ta di Joep van den Nieuwenhuizen.

Aruba mester tuma nota di efectonan secundario di e awaceronan

ORANJESTAD (AAN)-- Despues cu Aruba a confronta e efectonan di Horcan Ivan, caminda hopi famia a keda damnifica, awor e isla mester confronta otro efectonan secundario.

Por ehemplo, mester haci un yamado na tur e personanan cu a cana den awa durante e dianan aki, ya cu e posibilidad di un infeccion ta algo inminente. Tin hopi bestia cu a muri durante e horcan Ivan, locual por ta motibo di un serie di malezanan.

Crúz Cora a pidi na tur e personanan aki pa tuma e angua pa asina preveni cualkier maleza.

Tambe, semper, despues di un yobida, Aruba ta confronta cu e problema di dengue. Algo importante cu DIARIO ta recomenda den e dianan aki, ta pa tira un bista ariba e tirenan cu a yena cu awa, e boternan, cualkier articulo cu por a keda yen di awa pa asina cuminsa evita y elimina e criaderonan di e sangura cu ta portador di dengue.

For di awor, comunidad di Aruba por inicia un accion cu lo por evita gastonan innecesario. Ta conoci cu Departamento di Salubridad Publico semper, despues di un yobida ta confronta e problema di un aumento di e casonan di dengue. Pesey, ta importante pa pueblo tuma conciencia di e peliger aki y

asina evita cu e casonan di personanan infecta di dengue tuma lugar.

ESAKI A GANA CAMPAÑA DI ENTIERO!!

